

Болажонлар учун унутилмас лаҳзалар



Кеча туманимизда ўтказилган “Президент арчаси” тадбири фарзандларимизга қувончли онлар тақдим этди. Дилларга бир олам қувонч ва шодлик улашиб, барчамиз соғиниб кутган Янги йил айёми эшик қоқмоқда. Кумуш фаслнинг тароватли байрами болалигимизнинг беғубор лаҳзаларини ёдга солиб юбориши билан ҳам қадрлидир. Чунки бу айём биринчи галда болажонларимизга унутилмас лаҳзаларни тортиқ этади.

Янги йилни ям-яшил арча атрофида, шўх-шодон ўйинлар, шеру қўшиқлар билан қаршилаш, Қорбобонинг сеҳрли қопидан совға олиш ҳам уларга завқ-шавқ бағишлайди. Туман марказидаги сўлим истироҳат боғида ўрнатилган кўркам арча атрофида ташкил этилаётган шодиёналар бунга мисол бўла олади.

Янги йил байрамининг асосий тантанаси – “Президент арчаси” тадбири 29 декабр куни Ворсин маҳалласидаги маҳобатли “Темуржон” базмгоҳида бўлиб ўтди. Тадбирда ота-она қаровисиз қолган, Ватан ва сарҳадларимизни даҳлсизлигини таъминлашда, хизмат бурчини бажариш чоғида ҳалок бўлган ҳарбий хизматчилар, ҳуқуқни муҳофаза қилиш идоралари ходимларининг фарзандлари ва бошқалар, жами 240 нафар ўғил-қиз таклиф этилди.

Туман ҳокими Баҳодир Садуллаев болажонларни Янги йил айёми билан муборакбод қилар экан, уларнинг келажаги ишончли қўлларда эканлиги, муҳтарам Президентимиз томонидан яратиб берилаётган шарт-шароитлар фарзандларимизнинг комил инсон бўлиб вояга етишишига қаратилганлиги таъкидланди.

Шундан сўнг даврага болажонлар орзиқиб кутган Қорбобо ва Қорқиз, Буратино, бўри, тулки, қуён каби эртак қаҳрамонлари кириб келишди. Кўм-кўк арча атрофида ўйин-кулгу авжига чиқди. Тадбирнинг фаол иштирокчилари Қорбобо совғасидан баҳраманд бўлишди.

Маълумки, Янги йил арафасида Президентимизнинг байрам совғаларини жажжи ўғил-қизларимизга тантанали вазиятда топшириш анъанага айланган. Бу йил 28 нафар болажонларимиз ана шундай бахтга сазовор бўлишди.

Базмгоҳда бўлиб ўтган тадбирда ана шу совғаларни туман ҳокими Б.Садуллаев топширди. Фарзандларимизнинг тўкин дастурхон атрофидаги қувноқ кулгуси таниқли ҳофиз Зиёдулло Салимов бошлиқ туман Маданият бўлими санъаткорларининг куй-қўшиқлари билан уйғунлашиб кетди.

Тадбир болажонларимизга аъло кайфият бахш этди.



